

October 3, 2007 - Kahinaan sa pamamahayag bilang kapabayaan ng pamahalaan



If you like this post, please **subscribe to the RSS feed**. *N.B. ? This was published in Vol. 6, No. 38 (October 3-9, 2007) of Pinoy Weekly (p. 5), the full text of which may also be retrieved from http://www.risingsun.com/6-38/op_ed/ed-6_38_3.htm.*



Sunud-sunod ang mga *seminar at workshop* ngayon sa pamamahayag sa iba't ibang paaralan. Para sa mga pampublikong paaralan, kailangan ang mga ito bilang paghahanda sa National Schools Press Conference (NSPC) na taunang inoorganisa ng Department of Education (DepEd). Pero hindi naman nahuhuli ang mga pribadong paaralan sa paglahok sa iba't ibang paligsahan sa pamamahayag. May mga paaralan at organisasyon ding nag-oorganisa ng mga patimpalak sa pagsusulat para sa lahat ng estudyanteng interesadong sumali.

Ayon sa ilang kaibigan ko sa DepEd, ang NSPC ay gaganapin sa Pebrero 2008 kaya puspusan ang paghahanda ng ilang estudyanteng mula sa mga kalahok na pampublikong paaralan. Bago kasi ang NSPC, mayroong rehiyonal na paligsahang mangyayari mula Nobyembre hanggang Disyembre ng taong ito.

Kapag may mga imbitasyon para magbigay ng pagsasanay sa pamamahayag o magsilbing hurado sa mga paligsahan, kadalasang tinatanggap ko ang mga ito kahit minsang mas mahaba pa ang biyahe kaysa aktuwal na pananatili sa lugar.

Mahigit 24 oras ang biyahe, halimbawa, mula sa bahay namin sa Marikina City hanggang Romblon at pabalik samantalang wala pang 10 oras ang inilaang panahon ng mga nag-organisa para sa aking mga *seminar* at *workshop*. Gayundin ang nangyari kamakailan noong bumiyahé ako nang pitong oras papuntang San Pablo, Laguna at pabalik sa bahay namin para magturo at magsilbing hurado sa loob lang ng apat na oras.

Hindi naman ako nagrereklamo dahil kaya ko pa naman ang mahabang biyahe kahit sa siksikang bus o barko. Interesado kasi akong galugarin ang lugar na pinupuntahan ko, lalo na't unang pagkakataon kong mapadpad roon. Pero higit pa sa simpleng *sight-seeing*, mainam ding makipag-usap sa mga residente, lalo na sa mga estudyante. Mula sa kanila, nakakakuha ako ng malinaw na ebidensiya sa kalagayan ng buhay at kabuhayan sa komunidad na kadalasa'y hindi naipapakita ng mga opisyal na estadistika.

Halimbawa, bagama't nakasaad sa estadistika ng DepEd na 1:35 (elementarya) at 1:39 (hayskul) ang *teacher-student ratio* sa mga pampublikong paaralan para sa pang-akademikong taong 2005-2006, hindi ganito ang kaso sa maraming pampublikong paaralan, batay sa mga aktuwal na nakita ko at kuwento ng ilang guro at estudyanteng nakilala ko. Sabi nga ng ilang guro, kahit sila'y nagtataka kung bakit napakalapit sa ideyal na 1:25 ang pambansang estadistika samantalang malala ang sitwasyon sa kanilang paaralan.

Ang kalunos-lunos na kalagayan sa mga pampublikong paaralan ay may direktang epekto sa mga estudyante. Sa mga pagsasanay na isinagawa ko para sa kanila, napansin ko ang napakalaking kahinaan sa abilidad sa pagsusulat sa wikang Ingles at Filipino.

Bukod sa limitadong kaalaman sa ortograpiya, hirap din silang magsuri sa mga isyu o pangyayari na lubos na kinakailangan sa pamamahayag. Sa aking palagay, ang kahinaanang ito ay maiuugat hindi sa kawalan ng kakayahang mag-isip nang malalim

kundi sa kawalan ng pagsasanay sa paggamit ng mga angkop na salita para ibahagi ang kanilang saloobin. May malaking papel ang mga guro sa pagtuturo ng mga bagay na ito, pero nalilimitahan ang kanilang kapasidad dahil na rin sa abang kalagayan ng kanilang paaralan.

Sa mga *seminar* at *workshop* na isinagawa ko sa ilang probinsiya, aaminin kong minsang nagiging limitado rin ang aking kakayahang makapagturo. Halimbawa, paano ko mapagkakasya ang oras na inilaan sa akin kung kailangan kong mabilisang suriin ang sinulat ng ? huwag po kayong magugulat! ? mahigit 200 estudyante? (Para maging epektibo ang isang *workshop*, mainam ang 15 o mas kaunti pang partisipante para malalimang pag-aralan ang kalakasan at kahinaan ng mga isinulat.) Ayon sa mga nag-organisa ng mga *seminar* at *workshop* na may napakalaking bilang ng mga partisipante, limitado raw kasi ng pondong ibinibigay ng pamahalaan at kahit sila'y hirap ding mapagkasya ito.

Batay sa aking karanasan sa pagbibigay ng mga *seminar* at *workshop*, sadyang kakaunti lang ang mga estudyanteng may kapasidad na magsulat. Pero hindi tayo dapat mawalan ng pag-asa dahil ang pagsusulat ay hindi naman isang natural na abilidad kundi isang kakayahang kailangang pagyamanin sa pamamagitan ng tuluy-tuloy na pagsasanay. Pero paano kaya natin payayamanin ito kung limitado ang rekurso sa mga pampublikong paaralan?

Mainam ang isang paligsahan sa pamamahayag para bigyang-pugay ang magagaling na estudyante sa mahalagang larangang ito. Pero sana'y gamitin din natin ang pagkakataon para alamin kung paano mapapahusay ang mga napag-iiwanan, hindi dahil sa kanilang kabobohan kundi dahil sa kapabayaang pamahalaan.

Para makipag-ugnayan sa awtor, pumunta sa www.dannyarao.com.